

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Allah dž.š., nas je prvim ajetom Objave obavezao da **učimo**. Međutim, moramo imati na umu da znanje samo po sebi nije dovoljno, jer u procesu stjecanja znanja za svakog muslimana neophodna je i kvalitetna primjena tog znanja.

Djetinjstvo je nekad bilo doba u toku kojeg se dijete još u domu njegovih roditelja, pripremalo da sasvim samostalno uspješno i suvereno stupi u društvo odraslih, da preuzme dužnosti i odgovornosti života. U toku tog razdoblja selo, mahala, kvart i džemat, zajedno sa roditeljima, nenama i djedovima štitali su ga od svega onoga što je moglo raniti njegovu osjetljivu dušu.

Danas to nije slučaj. Medijska sredstva, internet, televizija i druga, ne štite i ne štede djecu i mlade od loših utjecaja, već ih izlažu pritisku slobodnih i liberalnih, često i nemoralnih pa i pogubnih ideja.

Važno je napomenuti da je učešće u odgoju djeteta, rad na izgradnji njegovog morala, najčasniji zadatak. To je, ustvari najvažnije što možemo dati svom djetetu/ci, važnije nego sve drugo na ovom svijetu. Poslanik s.a.v.s., kaže: **“Roditelj ništa vrjednije ne može ostaviti svome djetetu od lijepa odgoja.”**

Mi smo navikli da za sve postavljamo pitanje **zašto**, jer hoćemo da znamo razlog ili potrebu onoga što radimo. Ako možda postavljate pitanje zašto mekteb/vjeronauk ili ako se možda dvoumite, da li biste ili ne, upisali svoje dijete u mekteb/vjeronauk, ponudit ću vam više odgovora, koji će vam, nadam se, biti sasvim dovoljni da u vama prevagne odluka da djeca pohađaju mekteb/vjeronauk:

- jedna od glavnih islamskih dužnosti je podučiti svoju djecu osnovnim islamskim propisima i odgojiti ih u duhu Islama. Muhammed, s.a.v.s., je rekao: **„Roditelj je obavezan prema djetetu: da mu da lijepo muslimansko ime, da ga lijepo odgoji, da ga poduči pismenosti, plivanju i obrambenim vještinama, da ga izdržava halal imovinom i da mu pomogne da se oženi, odnosno, ako je kćerka, uda kad dođe vrijeme za to.“**

- nadalje, želimo sebe i svoju djecu da sačuvamo od raznih dunjalučkih iskušenja, a posebno od džehennemske vatre koja je pripremljena za one koji se oglušće o Allahove, dž.š., propise.

„O vi koji vjerujete, sebe i svoje porodice čuvajte od vatre...“ (Et -Tahrim, 6.)

- želimo da iza sebe ostavimo odgojenu djecu koja će živjeti u islamu i upućivati dovu Allahu, dž.š., za svoje roditelje i na najbolji način čuvati uspomenu na njih. Muhammed, s.a.v.s., je rekao: **„Kada čovjek umre prekida se mogućnost pristizanja dobrih djela, osim u tri slučaja: - ako je iza sebe ostavio valjano i hairli u Islamu odgojeno dijete koje mu dovu čini, - ako je**

ostavio trajnu sadaku - vakuf, koji i poslije njegove smrti koristi ljudima i - znanje kojim se ljudi koriste i poslije njegove smrti.“

- želimo da naša djeca upoznaju osnovne islamske propise, da razumiju smisao, potrebu i opravdanost tih propisa i da se naviknu da ih praktično primjenjuju, kako bi govorom i djelom bili istinski muslimani.

- želimo da naša djeca saznaju šta im je kao muslimanima halal - dozvoljeno, a šta haram - zabranjeno činiti, jer će samo ako budu radili dozvoljeno, a čuvali se zabranjenog, biti uspješni na ovom i budućem svijetu, te da nauče kakvo zlo i propast donose: alkohol, droga, prostitucija, krađa, laž, sijanje smutnje, ogovaranje itd. i da se toga čuvaju.

- želimo da se naša djeca druže i upoznaju sa drugom djecom, koja također čuvaju islamske vrijednosti u svojoj obitelji, te da se, kada dođe vrijeme za to, žene i udaju međusobno, jer loših primjera koji nas kao roditelje trebaju zabrinuti u ovom pogledu ima, nažalost, velik broj.

- želimo da naša djeca izgrade privrženost prema džematu i svojoj Zajednici i prema svemu drugom što je napredno i humano.

- želimo da nam djeca budu sretni i ponosni što pripadaju ummetu Islama, a ne da se toga stide.

Zato, braćo i sestre, mi ne smijemo dozvoliti da odgoj naše djece prepustimo slučaju i vremenu!

Još bih vam, braćo i sestre, predložio neke metode i načine kako djecu zainteresirati za vjeronauk.

Na početku ćemo nastojati kod djeteta razvijemo lijepu emociju kroz priče o svojim doživljajima iz mekteba, prijateljima koje smo tu upoznali, vjerskom, ali i drugom znanju koje smo tu stekli, a koje nas prati kroz cijeli život. Pokažimo da smo i mi dio priče o njegovom mektebu.

Aktivno sudjelujmo u stjecanju znanja - Ako se pouzdamo da je vjeroučiteljeva zadaća da nauči dijete i mi se ni najmanje ne uključimo u taj proces, na taj način pokazujemo djetetu da nas baš i ne zanima ono što ono na vjeronauku uči! Ne smijemo se zavaravati da je to što ga često zapitkujemo „Jesi li naučio?“, dovoljno - jer to i nije neki poticaj!

Dotaknite djetetovu dušu - Postoje momenti u životu svakog vjernika kada je vjera potakla najljepše emocije u srcu. Prenesite to djeci, ispričajte im što se vas najviše dojmilo u vjeri, neka učenje o vjeri dožive srcem.

Neka dijete osjeti da je dio Ummeta - Danas znamo da u cijelom svijetu djeca od najranijeg doba dolaze u džamiju po znanje. Svako ima svoje mjesto i svoj zadatak u džematu. Svako može doprinijeti popravljaju stanja u svome džematu i cijelom islamskom Ummetu. Uputite dijete da svojim prisustvom i vrijednim učenjem uljepša svoj džemat.

Nagradite mektepske uspjehe - Nagrada ne mora uvijek biti materijalna, i ne treba biti! Ispričajte članovima porodice o uspjehu djeteta u mektebu. Neka napiše ili nacрта taj moment kada je ostvarilo uspjeh,

crtež postavite na vidno mjesto, također i njegovo priznanje, diplomu ili pohvalnicu i dajte djetetu do znanja da ste ponosni na njega zbog toga.

Tražite povratnu informaciju - Po povratku iz mekteba razgovarajte sa djetetom o časovima u mektebu. Potaknite ga kratkim upitima da samo objasni šta je novo naučilo, šta mu je bilo teško da savlada i kako će pokušati to prevazići, a što mu se dopalo i zbog čega voli ići u mekteb.

Ne vežite negativne emocije za mekteb - Bilo kakva nesuglasica ili nezadovoljstvo metodom rada vjeroučitelja u mektebu treba da ostane i završi se između vas i njega. On je adresa na koju ćete uputiti svoju pritužbu. Dijete neće razumjeti ono čime vi niste zadovoljni i neće shvatiti da se to može popraviti, ono će jednostavno sve u vezi mekteba početi doživljavati negativno, najčešće za dug period života.

Poštovana braćo i sestre, ovom hutbom želim da uputim apel roditeljima te da ih pozovem da svoju dužnost prema djeci ispune i ne dozvole da se sutra kaju, da ih vlastita djeca osuđuju zato što ih na vrijeme nisu odgojili i usmjerili na Pravi put.

Pred Allahom dž.š., će odgovarati svaki onaj koji ne ispuni svoje obaveze, a za neispunjenje ovu obaveze, gotovo je sigurno, da će ga stići kazna još na ovom svijetu. Da nas Allah dž.š., pomogne i uputi nas, naše potomstvo i sve muslimane na Pravi put. AMIN!

Prethodne hutbe potražite na: www.medzlis-split.org

Pripremio: Vahid ef. Hadžić Split, 14.9.2018.



ZAŠTO JE VJERONAUK VAŽAN I NEOPHODAN?

537